

SAK 21/8202 Høyring - Lokal retningsline for tilskot til private barnehagar.

Alver kommunestyre har vedteke at det skal innførast tre teljetidspunkt i året som grunnlag for tildeling av kommunalt tilskot til dei private barnehagane.

Endringa frå eitt til tre teljetidspunkt vil få innverknad på drifta i Leiketun barnehage og vi er opptekne av at retningslinene skal vera så gode, nyttige og likeverdige som mogeleg.

I samband med denne uttalen har vi hatt kontakt med barnehagar utanfor Alver kommune. I nabokommunen Bergen har dei også fleire teljetidspunkt i løpet av året. Kommunikasjon med byrådsavdelinga med ansvar for barnehagar, viser at Bergen kommune har retningsliner og tilskotsordningar som barnehagane vi har snakka med, opplever er nyttige for å sikre at barn som har rett til barnehageplass faktisk får dette.

Alver kommune sitt framlegg til lokal retningsline og konsekvenser for oss.

I Alver er det vedteke at det skal vera teljetidspunkt 1.3., 1.9. og 15.12. Under punktet for innhald, teljetidspunkt står det: «Barn som i perioden 1.september til 30. november fyller eit år har rett til barnehageplass. Det vert gjeve tilskot for desse barna det året dei byrjar i barnehagen. Barnehagen må *registrere faktisk oppstartsdato i barnehageadministrativt system* for barn som skal begynne i barnehagen i denne perioden. Dette må vera registrert til teljetidspunkt 1.september. Barnehagen får *tilskotet frå den datoen barnet reelt byrjar i barnehagen*.

Desse barna har lovheimla rett til barnehageplass og det er Alver kommune sitt ansvar at dette vert handheva.

For desse barna som har fått tildelt barnehageplass og som byrjar utover hausten, må barnehagen la deira barnehageplass stå ledig i påvente av at barnet skal ta i bruk barnehageretten sin. Slik framlegget til desse retningslinene er utforma (utheva skrift) vil Leiketun og andre private barnehagar tapa både foreldrebetaling og kommunalt tilskot i den perioden desse barna ikkje har tatt i bruk barnehageplassen sin.

Det er heilt uakseptabelt at dei private barnehagane skal bæra dette tapet.

Kommunen sitt framlegg om at desse barna med lovfesta rett til barnehageplass skal få tilskot det året dei byrjar i barnehagen, men først frå faktisk startsdato, vil også bety at summen på det kommunale tilskotet vert usikkert for barnehagane. Foreldra sin intensjon om barnehagestart kan også vera noko anna enn faktisk oppstartsdato.

Kor mange barn dette vil innebæra for Leiketun, er det vanskeleg å vita. Men at det vil få store negative konsekvenser for den økonomiske situasjonen vår er sikkert. For tida er foreldrebetalinga kr. 3000,- pr barn pr. mnd. Driftstilskotet for dei yngste barna er kr 263550,- pr. barn pr. år og kapitaltilskotet er kr 11800 pr. barn pr. år.

Ut frå tidlegare år er det truleg at vi kan ha 8 barn med rett til barnehageplass fram til 30.11. Dersom desse er jamnt fordelte utover hausten må vi rekna med å kunne tapa meir enn 300.000 kroner.

Leiketun barnehage sitt perioderekneskap viser at vi vil gå mot underskot i år. Vi reknar ikkje med at det vert betre neste år med manglande kompensasjon for auka pensjonsutgifter, auka straumutgifter m.m.

Bergen kommune sine retningslinjer for kommunalt tilskot til barn med lovfesta rett til barnehageplass for 30.11.

Kommunalt tilskot:

Barnehagemyndet i Bergen opplyser at for å sikra at rettighetsbarn (barn som vert eitt år i løpet av hausten) og som har rett på oppstart i september – november får plass i hovudopptaket, vert dei også talde med ved teljinga 1.september, sjølv om dei startar seinare på hausten.

Ved teljinga 1.september vert altså alle barna som er i barnehagen og rettighetsbarn som er plasserte i barnehagen, men startar seinare, talde med. Endring av barn i august vert ikkje talde med utan at nokon melder frå om stor aktivitetsendring.

Foreldrebetaling:

Bergen kommune dekkjer tapt foreldrebetaling for barn med utvida rett til barnehageplass, det vil seia barn som fyller eitt år i september, oktober og november. Dette gjeld frå teljetidspunktet 1.september.

Me meiner at Bergen kommune sine kriterier for refusjon av tapt foreldrebetaling bør gjelda i Alver, sjå framlegg til tillegg i lokal retningsline.

Vi meiner at følgjande må endrast (pkt 1) og verta eit tillegg (pkt 2) til framlegg til «lokal retningslinjer for tilskot til private barnehagar»:

1. Pkt Innhald: Teljetidspunkt:

Setningane : » Barnehagen må registrera faktisk oppstartsdato i barnehageadministrativt system. Barnehagen får tilskot frå den datoen barnet reelt byrjar i barnehagen» går ut.

Desse vert erstatta med følgjande (i tråd med Bergen kommune sine retningslinjer):

Barnehagen får kommunalt tilskot for barn med lovheimla rett til barnehageplass innan 30.11. gjeldande frå teljetidspunktet 1. september dersom følgjande regler for oppstart vert fulgte:

- Nye barn som er over eitt år eller fyller eitt år innan 31.august vert registrerte i barnehageadministrativt system med plasseringsstart seinast 1.september

- Nye barn som fyller eitt år i september, oktober og november vert registrerte i barnehageadministrativt system med plasseringsstart seinast innan utgangen av den månaden dei fyller eitt år.
- Nye barn som fyller eitt år frå 1. desember må vera registrerte med plasseringsstart seinast 1.september.
- Ved særleg stor aktivitetsendring, kan ein søkja om ekstra tilskot for august mnd.

2. Tillegg til framlegg til lokal retningsline til tilskot: Refusjon av foreldrebetaling.

Tillegget er i samsvar med retningsliner for Bergen kommune:

Alver kommune dekker tapt foreldrebetaling for barn med utvida rett til barnehageplass, det vil seia barn som fyller eitt år i september, oktober og november med oppstart frå september.

Alver kommune har følgjande kriterier for refusjon av tapt foreldrebetaling:

- refusjon for august for barn som fyller eitt år i september, oktober og november og byrjar i barnehagen i september
- refusjon for august og september for barn som fyller 1 år i oktober og november og startar i barnehagen i løpet av oktober
- refusjon for august, september og oktober for barn som fyller 1 år i november og startar i barnehagen i løpet av november.

Det er Alver kommune sitt ansvar at desse barna med lovheimla rett til barnehageplass før 30. november faktisk får dette. Vår barnehage har ein pressa økonomi og kommunen kan ikkje skyva dette økonomiske tapet over på oss/ dei private barnehagane. Vi reknar med at dei kommunale barnehagane får dekkja sine evt. underskot ved at dei tar inn barn med slik lovheimla rett til barnehageplass. Kommunen har også betre høve til opp og ned bemanning enn ein einskild privat barnehage.

Barnehagemyndet i Bergen si grunngjeving for deira system var/er at det var viktig for kommunen å gje eit godt og likeverdig tilbod til desse barna. Og akkurat i oppstarten til desse små barna er det særst viktig å ha nok og stabile vaksne.

Alver kommune sitt grunnlag for å innføra 3 teljetidspunkt, var å kunne spara pengar på utbetaling av kommunalt tilskot til barnehagane. Dette vil då framleis gjelda for alle barnehageborn frå fylte 1 år til dei startar på skulen det året dei fyller 6 år.

Det må sikrast at barn med slik lovheimla rett til barnehageplass får dette i både kommunale og private barnehagar i heile kommunen vår. Då må det økonomiske grunnlaget vera tilstrekkeleg og likeverdig.

Med venleg helsing

Styret ved Leiketun barnehage AS

